

Transkript sa konferencije za medije međunarodnih organizacija

EUSR, Eldar Subašić

OSCE, Mersiha Čaušević-Podžić

EUFOR, Nicholas Foster

EUSR

Razgovori o policiji

Ured visokog predstavnika međunarodne zajednice i specijalnog predstavnika Evropske unije u BiH (OHR/EUSR) će prisustvovati neformalnim razgovorima o reformi policije koji se danas, na zahtjev bh. političkih stranaka, održavaju u rezidenciji ambasadora Njemačke u Sarajevu.

OHR/EUSR pozdravlja činjenicu da su lideri pokazali interes da nastave razgovore i spreman je da pomogne. Međutim, međunarodna zajednica želi i da vidi rezultate.

Juče su ministri vanjskih poslova zemalja-članica Evropske unije apelirali na nove vlasti da iskoriste sadašnji zamah kako bi ubrzali reformu policije.

Prošle sedmice je Upravni odbor Vijeća za implementaciju mira u Briselu jasno stavio do znanja da međunarodna zajednica očekuje da državne i entitetske vlasti prije sredine marta postignu sporazum oko Izvještaja Direkcije za reformu policije, kao i predloženog Sporazuma o implementaciji i vremenskim rokovima.

Kašnjenje u postizanju sporazuma i nakon sredine marta bi

moglo dovesti do značajnog kašnjenja u potpisivanju Sporazuma o stabilizaciji i pridruživanju. OHR/EUSR se stoga nada da će razgovori biti nastavljani krajem ove sedmice kako bi rezultati bili postignuti prije posjete komesara za proširenje Evropske unije Oljiga Rehna Bosni i Hercegovini 16. marta.

OHR/EUSR će nastaviti svoj angažman u procesu reforme policije u skladu sa zadatkom koji su mu dali Vijeće za implementaciju mira i Evropska unija.

Živjeli!

Želio bih da vam skrenem pažnju i na takmičenje koje je krajem prošlog mjeseca održano u Berkley Springsu, Zapadna Virdžinija, gdje je ocjenjivan okus više od 100 različitih marki vode iz 23 države SAD-a i 11 zemalja svijeta u različitim kategorijama.

Sudije su utvrdile da je četiri od pet najboljih gaziranih mineralnih voda iz Bosne i Hercegovine. Imamo originalni izvještaj za medije ako je neko od vas zainteresiran da vidi koje vode su navedene.

Vrijedno je istaknuti ovu priču jer ona pokazuje da su ovdašnja poduzeća sposobna da ispune najviše međunarodne standarde proizvodnje i kvaliteta. Ono što je tim poduzećima potrebno da bi otvorili više radnih mjesta i pomogli u podizanju životnog standarda je bolje poslovno okruženje.

Prije dvije sedmice, tokom svog govora na dodjeli FIPA-inih nagrada najboljim međunarodnim ulagačima u Bosnu i Hercegovinu, visoki predstavnik i specijalni predstavnik Evropske unije Christian Schwarz-Schilling je naglasio da razmjer stranih ulaganja ovdje predstavlja samo kap, samo dio onoga što bi trebao biti. Kako bi se ova kap pretvorila u bujicu, vlasti moraju usvojiti zakonske propise – za koje već postoji širok politički konsensus – koji će omogućiti da

domaća poduzeća budu konkurentna.

Sve dok se i ako se ne usvoje ključne reforme novac za proširenje poslovanja i nova radna mjesta će, umjesto u Bosnu i Hercegovinu, ići susjedima Bosne i Hercegovine, a konkurentna poduzeća će imati pred sobom težak zadatak u svojim naporima da proizvode ove zemlje prezentiraju na svjetskim tržištima.

Visoki predstavnik i specijalni predstavnik Evropske unije će večeras čašom bh. mineralne vode nazdraviti tom uspjehu.

OSCE

Misija OSCE-a u Bosni i Hercegovini želi čestitati gospodinu Mili Kudiću na njegovom imenovanju za člana Centralne izborne komisije Bosne i Hercegovine, kao i da mu poželi uspješan rad. Misija također želi izraziti svoju zahvalnost i pohvalu gospođi Lidiji Korać za njen izuzetan rad i njen dragocjen doprinos dosadašnjem uspjehu Izborne komisije. Rad gospođe Korać je bio nezamjenljiv u osiguravanju integriteta Centralne izborne komisije BiH, kao i pridobijanju poštovanja kojeg ova Komisija uživa i danas. Želimo joj uspješan rad u budućim poslovima.

Misija OSCE-a u Bosni i Hercegovini namjerava u potpunosti podržati sve odluke koje donesu članovi Parlamentarne skupštine Bosne i Hercegovine. Ali, u isto vrijeme, Misija se osjeća obaveznom izraziti zabrinutosti, koje se odnose na procedure koje se trenutno primjenjuju u Parlamentarnoj skupštini BiH, a odnose se na izbor članova Centralne izborne komisije.

Trenutno, ad hoc Komisija za izbor i imenovanja predlaže kandidate, u skladu s njihovim iskustvom, obrazovanjem, kvalifikacijama, i godinama staža. Pretpostavka je da Komisija ovo radi kako bi omogućila Parlamentarnoj skupštini izbor

najboljeg kandidata za upražnjene pozicije. Ali, proces glasanja, kakav je sada u upotrebi, ne uzima u obzir onakav odabir kandidata koji je izvršila Komisija. Ovo u praksi znači da profesionalne kvalifikacije kandidata, koji bi po mišljenju ove Misije trebali biti primarni kriterij prilikom odlučivanja o podobnosti za posao u Izornoj komisije, postaju tek druge po važnosti prilikom glasanja.

Daytonski sporazum je dodijelio OSCE-u zadatak usvajanja i uspostavljanja izbornog programa za Bosnu i Hercegovinu. Iz ovog razloga, Misija OSCE-a u BiH želi izraziti svoje mišljenje, a to je da bi se Parlamentarna skupština trebala ubuduće koncentrirati na profesionalizam i izorno iskustvo osoba koje bira za članove Centralne izborne komisije. Gledano dugoročno, to je jedini način očuvanja nezavisnosti i profesionalizma ovoga tijela, koje je s puno pažnje i napora uspostavljeno tokom protekle decenije.

EUFOR

Jučer je Vijeće za opće poslove i vanjske odnose Evropske unije donijelo odluku o rekonfiguraciji EUFOR-a. U sklopu sveukupnog angažmana u BiH, EU će zadržati svoje vojno prisustvo u zemlji kako bi i dalje davala svoj doprinos očuvanju sigurnog i stabilnog okruženja.

U skladu sa tranzicijskim planom za operaciju Altea, EU će smanjiti broj trupa EUFOR-a, s tim da će se to raditi postepeno uz očuvanje sposobnosti da spriječi moguće posljedice smanjena trupa i po potrebi osigura značajnije vojno prisustvo.

2.500 vojnika će biti raspoređeni u Multinacionalni manevarski bataljon i Integriranu policijsku jedinicu, sa sjedištem u Sarajevu. Pored toga, EUFOR će i dalje biti prisutan širom zemlje sa svojim Timovima za vezu i osmatranje (LOT). Značajne rezervne snage biće dostupne na strateškom

nivou i spremne da djeluju u cijeloj zemlji.

EUFOR će nastaviti sa izvršavanjem svog mandata provedbe mira i pružanjem podrške Međunarodnom sudu za bivšu Jugoslaviju (ICTY), uključujući i hapšenje lica optuženih za ratne zločine, s tim da je odgovornost za punu saradnju sa Haškim tribunalom na vlastima BiH.

Novinarska pitanja:

BHTV, Milica Vučetić:

Pitanje za vas gospodine Eldare. Što se tiče ove reforme policije, iskreno, evo kažu svi da su to ustvari neki nezvanični razgovori pa se nagađalo da li će biti u ambasadi ili rezidenciji, iako je zatvoreno za medije. Dakle, uopšte, šta možemo očekivati od današnjih razgovora? Da li će biti pomaka ka konačnom dogovoru ili je to samo još jedno druženje BH političara?

OHR/EUSR, Eldar Subašić:

Kao što znate, organizator ovog sastanka je upravo njemački ambasador i mi smo se pridružili tim razgovorima na njegov poziv. Kako je nama rečeno radi se o neformalnim razgovorima na kojima će se pokušati postići neka vrsta koncenzusa ili neki napredak u približavanju stajališta. Dakle, o konkretnim rezultatima i o tijeku razgovora morate pitati njemačkog ambasadora jer se ovi pregovori, konkretno danas, vode po njihovoj inicijativi. A inače OHR i USAID i dalje ostaju uključeni u sve razgovore koji će biti više formalne prirode.

BHTV, Milica Vučetić:

Vjerovatno Vam je poznata inicijativa Bošnjaka iz Srebrenice za iseljenje. Oni su izgleda ozbiljni pri svojim stavovima i zahtjevima, pa kakav je stav o tome?

OHR/EUSR, Eldar Subašić:

Mi smo također primili deklaraciju koja je jučer poslata domaćim vlastima i stranim, to jest međunarodnim institucijama u Bosni i Hercegovini. Trenutno razmatramo to pismo i nismo u mogućnosti trenutno komentirati jer smo ga tek primili na znanje.